

26-09-2025

खास-खास खबरां:-

- प्रधानमंत्री नरेन्द्र मोदी होर अज्ज बिहार च मुखमंत्री महिला रोजगार योजना शुरु करागंन। हर-इक महिला लाभार्थियें गी योजना तैहत 10 हजार रपे थोगंन।
- भारतीय वायु सेना अज्ज चंडीगढ़ च मिग-21 लडाकू हवाई जहाज गी विदाई देग।
- विदेश मंत्री डाक्टर जयशंकर होरें आतंकरोधी प्रयासें गी विश्व लेई इक सेवा करार दिंदे होई जी-20 मीटिंग च आपरेशन सिंदूर बारे दस्सेया-दसाया।
- चुनां कमीशन नै डॉक राएं पाएं गेदे वोटें दी गिनतरी सरबंधी नियमें च बदलाव करदे होई EVM गेड़ थमां पैहले इसगी लाजमी करी दिता ऐ।
- गृह मंत्रालय नै केई खिलाफवर्जियें मगरा सोनम वांगचुक दी NGO दा FCRA सर्टिफिकेट रद्द करी दिता ऐ।
- फिलिस्तीन दे राष्ट्रपति मोहम्मद अब्बाज होरें हमास दी निंदेया करदे होई संयुक्त राष्ट्र शांति योजना पर राष्ट्रपति ट्रम्प हुंदे नै साथ-सहयोग कन्नै कम्म करने दा प्रस्ताव कीता ऐ।
- पाकिस्तान सुपर-4 मुकाबले च बंगलादेश गी हरियै एशिया कप 2025 दे फाईनल च पुज्जी गेई ऐ- जित्थे ओदा मुकाबला भारत कन्नै होग।

<><><><><><>

### PM- Bihar Yojana

प्रधानमंत्री नरेन्द्र मोदी होर अज्ज वीडियो कांफ्रेसिंग राएं बिहार च मुखमंत्री महिला रोजगार योजना शुरु करागंन। प्रोग्राम च प्रधानमंत्री होर समूलचे बिहार थमां 75 लक्ख महिलायें दे बैंक खातें च 10 हजार रपे मुंतकिल करगंन। इक ब्यानै च प्रधानमंत्री दफतरै आखेया जे इस पैहलकदमी राएं बिहार सरकार महिलायें गी आत्मनिर्भर बनाना चाहंदी ऐ ते स्वयं रोजगार ते जीवन-यापन दे होर मौके पैदा करियै उनेंगी सशक्त बनाना चाहंदी ऐ। इस योजना राएं महिलायें गी आप-मदादी ग्रुपें कन्नै जोड़ियै उनेंगी माली मदाद ते सिखलाई दिती जाग। इस मदाद कन्नै महिला लाभार्थी अपनी मर्जी दा रोजगार शुरु करी सकगंन ते आर्थिक तौरा पर स्वतंत्र ते समाजिक तौरा पर बाअख्तेयार बनी सकगंन।

<><><><><><>

### PM-World Food India

प्रधानमंत्री नरेन्द्र मोदी होरें आखेया जे कुल संसारी निवेशक खास करियै अन्नदाने आले क्षेत्र सरबंधी निवेशक, भारत आली बक्खी बड़ी मेद कन्नै दिक्खा रदे ना। नमीं दिल्ली च कल विश्व खाद्य भारत 2025 प्रोग्राम च भाषण दिंदे होई प्रधानमंत्री होरें आखेया जे मुकामी मंग

भारत गी इक मुकाबलाकुन बढत दिंदी ऐ ते निवेशकें लेई इक पसंददीदा थाहर बनांदी ऐ। 21मीं सदी दी चुनौतियें बारे गल्ल करदे होई प्रधानमंत्री मोदी होरें आखेया जे कुल संसारी चुनौतियें दे बावजूद भारत नै अगगे बढदे होई साकारात्मक भूमिका निभाई ऐ ते कुल संसारी खाद्य सुरक्षा च अहम योगदान दिता ऐ। उनें आखेया जे कुलसंसारी खाद्य संकट होऐ जां सप्लाई चेन च विघ्न, भारत नै महेशा अपनी जिम्मेदारी पूरी कीती ऐ।

<><><><><><>

### IAF Farewell

भारतीय वायुसेना अज्ज चंडीगढ़ च मिग-21 लड़ाकू जहाज गी विदाई देग। एह समारोह 60 बरे थवां मते समें तगर मुख दी सेवा करने आहले इस लड़ाकू जहाज दे इक युग दे अंत दा प्रतीक ऐ। इस मौके पर रक्षामंत्री राजनाथ सिंह होर मुख परौहने दे तौर पर उत्थे मौजूद रौहगंन। उन्दे कन्नै सी.डी.एस. जनरल अनिल चौहान द्विवेदी ते वायु सेना प्रमुख वी.आर. चौधरी बी मौजूद रौहगंन। रक्षा मंत्रालय नै इक ब्यानै च आखेया ऐ जे मिग-21 भारतीय वायुसेना दा इक गौरवशाली प्रतीक ऐ, इक निडर योद्धा ऐ जिसने अपनी वीरता, पीढियें तगर कायम रखी।

<><><><><><>

### Jaishankar G-20

विदेश मंत्री डाक्टर एस.जयशंकर होरें आखेया ऐ जे आतंकवाद कन्नै लड़ने आहले असल च अंतराष्ट्रीय समुदाय दी सेवा करा रदे ना। न्यू-यार्क च जी-20 विदेश मंत्रियें दी बैठक च ऑपरेशन सिंदूर बारे च प्रस्तुति दौरान डाक्टर जयशंकर होरें आखेया जे आतंकवादियें बश्कार व्यापक नेटवर्किंग गी दिक्खदे होई, जेडा इसदे कन्नै निबड़ने आस्तै संघर्ष करदे न ओह समग्र तौर पर अंतराष्ट्रीय बरादरी दी व्यापक सेवा करदे ना। उनें आखेया जे दुनिया गी आतंकी गतिविधियें गी दना बी बर्दाश्त नैई करने दी नीति पर अमल करना चाहिदा। विदेशमंत्री होरें प्रतिबंध लागू करने च दुनिया दे दोहरे मापदंडे दी बी निंदेया कीती। उनें आखेया जे पाबंदियें कन्नै आपूर्ति ते लोजिस्टिक्स च बाद्दा हुंदा ऐ ते लागत बढदी ऐ ते मुल्ले पर दबाव बनदा ऐ। डाक्टर जयशंकर होरें आखेया जे आर्थिक तौर पर नाजुक स्थिति च ऊर्जा ते होर दुई जरूरी चीजें-बस्ते गी मता अनिश्चित ते यक्को-तक्की आहला बनाने कन्नै कुसै दा बी भला नैई होगा।

<><><><><><>

### EC Postal Ballots

निर्वाचन आयोग नै पोस्टल बैलेट दी गिनतरी सरबन्धी नियमें गी संशोधित कीता ऐ। EVM ते VVPATS दी गिनतरी दे खीरी गेड़ दे पैहले सारे डॉक मतपत्रें दी गिनतरी गी लाजमी करी दिता गया ऐ। आयोग दे ब्यानै च आखेया गया ऐ जे चुनाव सुधारे कन्नै सरबन्धित 30मीं पैहल दा मकसद वोटें दी गिनतरी च तेजी, पारदर्शिता ते इकरूपता आनना ऐ। इसदे आस्तै डॉक मतपत्रें दी गिनतरी गी मुखधारा कन्नै जोड़ना ऐ। निर्वाचन आयोग नै आखेया ऐ जे दिव्यांगजनें ते 85 बरे थवां मती उमरी दे वरिष्ठ नागरिकें गी घरै थवां वोट पाने दी सुविधा करी हाल दे चुनाएं च डॉक मतपत्रें दी गिनतरी च टकोहदा बाद्दा होआ ऐ।

## Home Ministry –Sonam Wangchuk

गृह मंत्रालय नै केई खिलाफवर्जियें मगरा सोनम वांगचुक दी गैर सरकारी संगठन यानि NGO दा FCRA सर्टिफिकेट रद्द करी दिता ऐ। आधिकारिक सूत्रें मुजब सोनम वांगचुक होरें 2021-22 च अपनी संस्था FCRA दे बैंक खाते च नियमें दी खिलाफवर्जी करदे होई साड्डे 3 लक्ख रपे जमा कराए। NGO गी स्वीडन दे इक दानकर्ता थमां विस्थापन, शिक्षा, जलवायु परिवर्तन, खाद्य सुरक्षा ते खुदमुखतेयारी सरबन्धी प्रोग्रामें लेई 4 लक्ख 93 हजार 205 रपे हासल होए हे। मंत्रालय नै आखेया जे कोई बी संस्था जां व्यक्ति मुल्खे दी मुदमुखतेयारी पर अध्ययन गितै विदेशें थमां दान नैई लेई सकदा ते ए मुल्खे दे हितें दी खिलाफवर्जी ऐ। मंत्रालय नै आखेया जे FCRA कानून दी केई धाराएं तैहत सोनम वांगचुक हुंदी NGO दा पंजीकरण रद्द करी दिता ऐ।

## Palestine Statehood

फिलिस्तीन दे राष्ट्रपति महमूद अब्बास होरें हमास दी निंदेया कीती ऐ। उंनै संयुक्त राष्ट्र दे समर्थन आहली शांति योजना पर अमरीका दे राष्ट्रपति डोनाल्ड ट्रम्प हुंदे कन्नै मिलियै कम्म करने दी इच्छा जाहिर कीती। संयुक्त राष्ट्र महासभा च शामिल होने थमां रोके जाने मगरा वीडियो दे राएं अब्बास होरें सरबन्धी जमीन पर फिलिस्तीन दा दावा दोहराया। उंनै आखेया जे ओह अमरीका, फ्रांस ते सऊदी अरब दे सहयोग आस्तै त्यार ऐ। फिलिस्तीन गी बक्खरे मुल्ख दा दर्जा देने आहले मुल्खें दी गिनतरी 150 थवां मती होई गेई ऐ। अब्बास होरें इजराईल गी फिलिस्तान दी धरती पर कब्जा नैई करने दी चेतावनी दिती ऐ जे इसदे कन्नै संयुक्त राष्ट्र दे समर्थन कन्नै 2 मुल्खें सरबन्धी हल खतरे च पेई सकदा ऐ।

## GST Reforms

जी.एस.टी. कौंसल नै बड्डे सुधारें गी मंजूरी दिंदे होई कर-ढांचे गी 5 फीसदी ते 18 फीसदी दी दंडु मुख स्लैबे च सखल्ला बनाई दिता ऐ, जेहदे च तम्बाकू जनेई चीजें उप्पर 40 फीसदी दी दर लागू करी दिती गेई ऐ। पनीर-चपाती ते UHT दूध जनेई जरुरी चीजां हून कर-मुक्त होई गेइयां ना। राई-बाई सरबन्धी मशीनरी उप्पर जी.एस.टी. घटाइयै हून 5 फीसदी ते 350 सी.सी तगर दो दोपहियें गड्डियें उप्पर हून छड्डा 18 फीसद जी.एस.टी. लगोग, जेहदे करी मध्यम वर्ग परिवारें गी लाह हासल होग। नरेन्द्र मोदी होरें सबभन्न लोके गी स्वदेशी उत्पाद खरीदने दा आग्रह कीता ऐ जेहदे कन्नै मुकामी कारीगरें ते लौहके उद्यमें गी इजाफा होग।

## Para Archery World C'ship

भारत दे दक्खन कोरिया दे Gwangju च चला रदी पैरा तीर-अंदाजी दी विश्व प्रतियोगिता च घट्ट शा घट्ट त्रै तगमें जीतना तय होई गया ऐ कीजे तीर अंदाजे Compound Open वर्ग च सुन्ने दे तगमे दे मुकाबले च अपनी थाहर पक्की करी लेई ऐ। जम्मू-कश्मीर थमां पैरा ओलम्पिक च कैह दा तगमा हासल करने आहले राकेश कुमार ते तोमन कुमार दवै मर्दे दी Compound Open व्यक्तिगत मुकाबले च सुन्ने दा तगमा हासल करने लेई मैच खेडगंन। जम्मू-कश्मीर दी 18 बरे दी शीतल देवी नै ब्रिटेन दी Jodie Grinham गी 145-140 कन्नै हराइयै महिला फाईनल च प्रवेश करी लैता ऐ। हूंन उन्दा मकाबका दुनिया दी नम्बर इक खडारन तुर्की दी Ozgur Cure Girdi कन्नै होगा।

<><><><><><>

## Asia Cup Cricket

एशिया कप क्रिकेट प्रतियोगिता-2025 च जंदी राती दुबई च खेडडें गेदे सुपर-4 मुकबाले च पाकिस्तान नै बंगलादेश गी 11 रनजे कन्नै हराइयै फाईनल च थाहर पक्की करी लेई ऐ। इस जित्त कन्नै पाकिस्तान दा मुकाबला फाईनल च हूंन भारत कन्नै होगा। एशिया कप दे 17 संस्करणें च ऐसा पैहली बारी ऐ जे भारत ते पाकिस्तान पैहली बारी फाईनल च आमने-सामने होगंन। उआं फाईनल थमां पैहले सुपर-4 मुकाबले च भारत दा मैच श्रीलंका कन्नै होगा।

<><><><><><>